

Simbegwire


 Rukia Nantale

 Benjamin Mitchley


 Stephen Zulu

 5

 IciBemba




Lintu banyina Simbegwire baafwile, aali uwabulanda saana. Bawishi balyesha na maka yonse ukumusunga bwino no kumusansamusha. Panoono-panoono, baatampile ukusansamuka na kabili, nangu banyina Simbegwire bashalipo. Cila lucelo baleikala pamo no kulanda pafya ubo bushiku buleba. Cila cungulo baalepekanya umulalilo bonse. Panuma ya kusamfya imbale, bawishi Simbegwire baaleafwako umwana imilimo yaku sukulu.



Ubushiku bumo, bawishi Simbegwire baalicelelwe ukubwela ukucila inshita baalebwelelapo lyonse. Baitile Simbegwire abati, "Ulikwisa we mwana wandi?" Simbegwire aabutukiile kuli bawishi. Aileiminina shika ilyo aamwene bawishi nabekatilila ukuboko kwakwa namaayo. "Mwana wandi, ndefwaya uposhe aba njishile nabo. Niba Anita," efyalandile bawishi ninshi baalemwentula.



Ba Anita abati, “Mwapola Simbegwire, bawiso balinshimikila ifintu ifingi pali iwe.” Nomba tabamwentwile nangu ukutambika ukuboka ku mwana. Ba wishi Simbegwire baali temwa na ukusansamuka saana. Balandile pafyo bonse batatu bakalaikala pamo, na pafyo imikalile yabo ikawama. Abati, “We mwana wandi, ndesubila ukasumina ba Anita ukuba banoko.”



Ubwikashi bwakwa Simbegwire bwalicinjishe.
Taakwete inshita yakuba na bawishi ulucelo. Ba
Anita baaleemupeela incito shapa njanda ishingi
saana icakuti aaleenaka aaleefilwa no kubomba
imilimo yaku sukulu icungulo. Aaleeyafye mu
kusendama panuma ya kulya icakulya ca mulalilo.
Icaleemusansamushafye buulangeti bwamalangi
ubwamupeelee banyina. Calemoneka kwati bawishi
Simbegwire tabaishibe kuti umwana wabo
taasansamwike.



Panumafye ya myeshi inoono, bawishi Simbegwire balilaile pa ganda ukuti baleefumapo panshita inoono. Abati, "Mfwile ukuya ku ncito. Nomba ninjishiba ukuti mwakulasunganafye bwino." Simbegwire taasansamwike, nomba bawishi taabaishibe. Ba Anita taabalandile nangu cimo. Nabo tabaatenenwe iyoo.



Imikalile yakwa Simbegwire yalibiipiileko. Nga tapwishishe incito isha mu nganda, nangu nga ailishanya, ba Anita baaleemuuma. Pa mulalilo, Ba Anita eebaaleelya ifyakulya ifingi, baashilakofye Simbegwire utunoono. Cila bushiku Simbegwire aaleelaala alelila ninshi nakumbatila no bulangeti bwaba nyina.



Ubushiku bumo ulucelo, Simbegwire alicelwe ukubuuka. Ba Anita baapatile ati, "We munani wamwanawe!" Efyo baakulwile Simbegwire ukumufunya pa busanshi. Ubulangeti atemwishishe bwaiketwe ku musomali no kulepuka ukwakanika pabili.



Simbegwire alifulilwe saana. Aasalilepo ukufyuka pa
nanda. Aasendele utupimfya twa bulangeti bwaba
nyina, alonga no twakulya, no kufuma pa nanda.
Aakonkele umusebo mwapitile bawishi.



Cilya bwaila, aniina ku cimuti icitali mupeepi na kamana no kupanga ubusanshi mu misambo. Pa kulaala, alaimba ati: “Maayo, maayo, maayo, mwalinsha ine. Mwalinsha ukwabula ukubwela. Bataata tabatemwa nomba. Maayo ni lilali mukabwela? Mwalinsha ine.”




Ubushiku bwakonkelepo ulucelo, Simbegwire
aimbile ulwimbo na kabili. Ilyo banamaayo baishile
mu kucapa ifyakufwala mu mumana, baumfwile
ulwimbo lwacililishi lulefumina ku cimuti icitali. Mu
maano abati mwela uleelisha amabuula, awe
bakonkenyepo ne milimo yabo. Nomba umo pali
beena akutikishe ku lwimbo.




Uyu namaayo aalooleshe ku muulu wa cimuti. Lintu aamwene akakashana no tupimfya twa bulangeti ubwamalangi, aapundile ati, "Simbegwire, umwana wakwa ndume yandi!" Banamaayo bambi baaleekele ukucapa bayafwilishako Simbegwire ukwikila ku cimuti. Banyina-senge bakumbatile akakashana no kwesha ukukatalalika.



Banyina-senge baasendele Simbegwire ku njanda ku mwabo. Panuma, baamupeelee icakulya icakaba, no kumufimbilisha no bulangeti bwaba nyina pa busanshi. Bulya bushiku, Simbegwire aalilile pa kulaala. Nomba fyali fiilamba fyansansa. Aalishibe ukuti banyina-senge bakamusunga bwino.



Ilyo bawishi Simbegwire baabwelele pa njanda, baasangile Simbegwire talimo mu muputule wakwe. Baipwishe bulanda-bulanda abati, “Anita, finshi fyacitike?” Namaayo alondolwele ukuti Simbegwire aalifyukile. Ati “Naalefwaya ancindike. Nomba limbi caalicilamo.” Bawishi Simbegwire baafumine pa njanda no kulola ku mumana. Bakonkeyepo ukuya ku mushi ukwaleikala bankashi yabo mu kuyaipusha nga cakuti baalimweneko Simbegwire.



Simbegwire aaleyangala na bafyala bakwe ilyo aamwene bawishi akatalamukila. Aalitinine ukuti limbi balikalipe, icalengele ukuti abutukile mu nganda mu kubelama. Nomba bawishi baile kuli ena elyo balanda ati, "Simbegwire, nausanga banoko abalingile. Banoko abakutemwa kabili abakwishiba ifyo waba. Naucitafye bwino elyo kabili naalikutemwa." Baasuminishenye ukuti Simbegwire kuti aikala na banasenge apo aleefwaila.



Bawishi baalemutandalila cila bushiku. Mpaka pakulekelesha, baishile naba Anita. Ba Anita baikete Simbegwire pa kuboko. Abati, “Unjeleleko we mwana, nalilufyenye. Bushe kuti wansuminisha ukuti njesheko na kabili?” Simbegwire aaloleshe bawishi abaaleemoneka ukusakamana. Simbegwire aendele panoono-panoono no kukumbatila ba Anita.



Umulungu wakonkelepo, ba Anita baitile Simbegwire ukwisa ku njanda ku maliila pamo na bafyala bakwe na banasenge. Yaali maaliila! Ba Anita baapekenye fyonse ifyakulya Simbegwire atemwishishe, na bonse baaliliile mpaka baikuta. Panuma, abaice baile mukwangala elyo abakalamba baashele baleeshimika ilyashi. Simbegwire aumfwile insansa kabili taakwete no mwenso. Aatontonkenye ukuti tacali na kupoosa inshita, aali no kubwelela pa njanda mu kwikala na bawishi na banyina ba Anita.





Storybooks Zambia

storybookszambia.net

Simbegwire



Rukia Nantale



Benjamin Mitchley



Stephen Zulu

